

四庫全書

史部

欽定四庫全書

史部

世宗憲皇帝上諭內閣卷一百五十九

詳校官左都御史<sub>臣</sub>李綬

編修<sub>臣</sub>張謙覆勘

總校官原任中允<sub>臣</sub>王燕緒

校對官原任典簿<sub>臣</sub>郭祚熾

謄錄監生<sub>臣</sub>劉紳

欽定四庫全書

世宗憲皇帝上諭內閣卷一百五十六

雍正十三年五月

上諭六道

初五日奉

上諭西陲用兵以來一應軍需皆取資於公帑絲毫不以累民惟是甘肅等處運送糧餉不能不藉民力輓輸朕心時為軫念既已屢沛恩膏卽當豐稔之年亦下蠲租

卷一百五十六  
之詔所以獎百姓之急公示朕心之體恤也茲聞甘省  
所屬地方今年入夏以來有雨澤愆期之州縣或恐收  
成稍薄納課艱難著將雍正十三年甘肅通省所屬應  
徵地丁錢糧全行蠲免俾催科不擾民力寬舒該督撫可  
董率有司實力奉行以副朕加惠秦民之至意

初八日奉

上諭三姓八姓渾春地方兵丁每年只支給餉銀十二兩  
著照寧古塔吉林烏拉等處兵丁之例給與二十四兩

全分餉銀

十六日奉

上諭前據湖南巡撫鍾保奏請將湖南通省鋪司裁改遞馬經廷臣議令會同總督邁柱妥議具題今鍾保未曾會同邁柱定議但奏稱邁柱因湖北不議裁改是以未經會題等語湖南鋪司若果應裁改遞馬則督撫大臣自應會商定議者况朕聞鋪司改設遞馬多有不可行之處如山僻州縣道路險仄馬匹不能行走即令勉強

更改亦屬陽奉陰違以人代馬再如兩岐三岔四面皆通之處文書往來甚繁自應分頭遞送不得不多設馬匹人夫其費用必多於舖司原額且此馬零星安設稽察繁難若但交與馬夫勢必至於尅扣草料疲瘦倒斃若交附近驛站仍不過派撥驛馬應差而該州縣佐貳亦各有專司不能時時查察是一利未興而諸弊隨起不可不詳加酌定著該部悉心妥議具奏

十八日大學士等奉

上諭前據湖廣督撫提鎮奏報台拱逆苗不法情形比即降旨與湖廣督提於調發官兵三千名外再撥官兵二千名陸續前進以備征勦之用又諭廣西撫提派撥精兵三千名分為兩路前往以資應援彈壓今覽雲貴總督尹繼善奏摺其所檄調鄰省官兵之處與朕諭旨相符計此時進勦之兵合四省計之已二萬有餘哈元生親在軍前統領調度諒自有平定之策爾等可傳諭哈元生乘此兵威須將清江台拱上下九股兇苗及內地

倡首附逆惡寨痛加勦除務盡根株不貽後患其遠寨  
逼脅附從各苗有悔罪求撫者皆令盡繳器械然後准  
撫倘敢抗違不繳亦相機勦除今番如此辦理方能一  
勞永逸若其中有勢不可行處可據實奏聞但毋得稍  
存姑息之念陽奉陰違令異日更啟事端提督哈元生  
統領四省官兵著授為將軍凡赴援將弁俱聽伊節制  
調遣其將軍名號敕印著大學士議奏請旨速行頒發  
并傳諭尹繼善知之



二十四日奉

上諭據山西巡撫石麟奏稱太原府陽曲縣紳衿士民李  
杭等汾州府汾陽縣紳衿卞時盛等情愿各捐銀兩存  
貯公所以為周恤比閭之資臣現在與各該地方官公  
同酌議或置田地或為營運因地制宜以垂永久等語  
夫所謂樂善好施扶危濟困者大抵於水旱饑饉之歲  
散財發粟賑救窮黎又或於平常無事之時造義倉以  
儲米穀修橋路以便行人或置敦宗贍族之田或立養

老育嬰之所凡此善事多端必須出自本人之誠心而  
又親身經理誼同休戚始可以惠鄉閭而收實效今石  
麟奏稱陽曲汾陽兩縣紳衿士民願捐銀兩存貯公所  
其作何措置之道俟與地方官公同酌議是該處竝無  
現在應辦之事此乃另開捐納之條也若遇無才之有  
司經理不善必致為胥吏之所中飽土棍之所侵蝕而  
無益於貧乏之人此人人能料及者石麟如此辦理是  
何意見陽曲汾陽紳衿士民等既已捐助其樂善好施

之念可嘉著交部分別議叙石麟務將各姓所捐之銀  
妥商位置令地方得實受其益勿致虛糜向後若有無  
故捐銀交官者與朕原旨不符俱著停止

二十八日奉

上諭據貴州提督哈元生巡撫元辰成奏報古州逆苗不  
法臣哈元生於四月二十日馳赴軍前調度閏四月三  
十五月初一日副將紀龍周儀署叅將哈尚德崔傑  
等各領官兵分路擊殺逆苗奔逃斬獲無算驛路開通

黃平一帶地方居民復業及時耕種等語前聞黃平一帶居民被逆苗擾害朕心深為軫念已經降旨諭令該督撫動撥正項錢糧確查賑恤今民人復業之初或仍有遷徙未回及資生無力者著元展成遴選賢員招徠安插加意撫綏勿令一人失所此次哈元生進勦已降旨授為揚威將軍所有在事有功將弁兵丁俟事竣查明分別議叙其附賊之逆寨餘黨應勦應撫之處著哈元生酌量辦理據元展成奏摺內稱黃平地方為倉廩監

獄重地元展成既知黃平為倉廩監獄重地逼近苗疆  
從前何意止設官兵三十名被賊侵擾而平時全不留  
心籌及亦不具奏請旨以致倉卒無備甚屬溺職今官  
兵到彼賊苗迴避乃自然之情勢而元展成奏報之時  
不自知從前辦理之非大言不慚似有以地方復舊為  
幸之意甚屬不合事畢論其功過著該部嚴察議奏

世宗憲皇帝上諭內閣卷一百五十六

欽定四庫全書

世宗憲皇帝上諭內閣卷一百五十七

雍正十三年六月

上諭九道

十二日刑部奏諾樂洪叅奏福祿各款竝無實蹟但福祿係允祇用人行止不端應擬斬監候奉

上諭前據諾樂洪密奏福祿乃允祇心腹用人心術行止俱不可問於北路出兵時營求派往及到軍前毫無効

力之處又復錯營該管諸大臣由護軍校委署防禦復委副叅領又署理掌管緊要軍機兵部員外郎之缺似此匪人竟充要職恐於軍機不無擾亂洩漏殊屬未便等語朕因覽諾樂洪所奏福祿秉性奸邪存心叵測種種夤緣鑽刺之處大干法紀是以降旨拏解回京交與刑部嚴審定議具奏今覽刑部審訊情由是福祿出兵數年竝無過犯且在河通胡爾哈殺賊受傷得受恩賞又曾派往科卜多隨征効力凡諾樂洪所奏皆全無影



響之事且諾樂洪狡猾乖張近日諸事敗露此即伊造  
言誑奏之一端也福祿著釋放其諾樂洪原摺著發出  
與福祿併衆閱看竝令在廷臣工共知之朕待天下臣  
民無不與以改過自新之路即如阿其那塞思黑隆科  
多年羨堯之黨與屬下朕加恩錄用者不可勝數竝無  
成見成心豈以福祿為允穢舊屬而存刻待之意祇因  
諾樂洪叅奏不得不將福祿拏交審問該部既審無不  
法實蹟而且有行間効力之勞便當據實奏聞請旨豈

有不審實情強引律條擬以大辟之理著嚴飭行

十五日禮部議覆貴州學政晏斯盛奏黎平府屬亮寨長官司正長官龍紹儉陳請科舉應不准行奉

上諭土司龍紹儉原由生員出身既有志觀光陳請科舉著准其一體應試若得中式其土司世職亦可著將應襲之人舉出請襲

十八日奉

上諭據扎魯特貝勒阿第沙報稱今歲春時亢旱將伊旗

分人等移於近河潮濕之地居住五月初七日大雨竟  
日夜間水發淹没人畜甚多等語扎魯特等旗分年來  
連值旱澇收成歉薄今又遭此水患深可憫惻從古天  
人感召之理一定不易果能各修人事安分循理

上天必加護佑錫之以福若所行不善即可以致災患此被  
災旗分之扎薩克台吉等身圖安逸怠玩公事苦累屬  
下不加愛惜所屬人等不知親上之義罔遵法紀貪營  
小利互相盜竊因而干犯天和災害疊至儻不知悛改

猶以被災怨望安能消禍致福國家設立法度原以  
安民生凡官差派遣誠能實心行走自然免於罪戾以  
獲善報嗣後扎薩克台吉等宜居心忠正各盡職業勤  
於公事愛養屬下令其從善其部屬民人各守分遵法  
承應官差黽勉効力如此上下鼓勵交勉於善則

上天洞鑒自能雨暘時若災患不生人畜滋息米糧豐稔共  
享安寧之福其理固不爽也即今蒙古等於遊牧處謀  
生豈不知地方形勢而於夏令雨水之時率衆環居近

河之地並不防護以致被災此皆怠惰成習昧於謀生  
後此可不加謹慎耶著將此旨行文衆扎薩克等令其  
遍行傳諭各加勉旃

十九日

諭內閣現今道府出缺甚多一時不得勝任之員著在京  
三品以上滿漢官員於現任科道部屬及知府同知知  
州通判知縣內各舉一人或勝道員之任或勝知府之  
任填註明白於三日內交送內閣彙齊奏聞候朕簡用

若所舉有相同者亦准彙奏大臣等歷官年久豈無深知確信之一人可膺保薦者況奉朕特旨尤當矢公矢慎以副朕諮詢之意儻懷挾私心瞻徇情面又蹈從前舊轍將來所舉之人或有不端劣蹟或不能勝任無忝定將原保舉之大員嚴加議處

二十二日奉

上諭向來外任官員告病者即行休致無病痊復用之例朕從愛惜人材起見特准各省督撫酌量若屬員居官

素優而患病是實者於告病本中聲明病痊引見補用  
此朕體恤成全之恩旨也近於引見之時見起用各員  
本無大恙調治未久即赴部銓補者甚多則本來患病  
之不實顯然矣又有借名告病而巧為規避者或因繼  
起有人囊橐豐厚冀娛晚景或因民俗刁悍地方繁劇  
慮及考成其該管上司但見屬員不戀官職遂爾代題  
而不覺受巧宦之欺朦也如原任福建漳州府知府王  
之琦同知王時翔等皆因地方繁難而託詞告休者本

皆精神强健竝非實病得請之後讌樂歡遊朕知之最確似此者各省不可枚舉今元展成題請平越府知府朱東啟告假回籍調理俟病痊起用一疏明係該員畏懼苗疆而為此規避之計朱東啟著解任仍留黔省調理俟病痊之日自黔送部引見將來凡有似此告病該督撫題請病痊起用者俱著留於該省調理不准回籍俟病痊之日該督撫送部引見若永遠告休不請起用者該督撫司道必察其患病果實一時難痊或年老力



衰不能辦事然後申請題達儻受屬員之欺朦或徇平  
日之情面仍蹈從前故轍經朕訪聞必將該上司從重  
議處

二十三日奉

上諭據福建提督王郡奏稱呂宋國以麥收歉薄今附洋  
船載穀二千石銀二千兩海參七百觔來廈賣銀糴麥  
多則三千石少則二千石臣查五穀不許出洋律有明  
禁今呂宋以穀易麥臣與督臣撫臣現在商酌請旨等

語朕統御寰區內外皆為一體呂宋雖隔重洋朕心竝無岐視國家之所以嚴禁五穀不許出洋者乃杜奸商匪類私販私載暗生事端之弊若該國偶然缺少米糧以實情奏聞於朕朕尚酌量盈餘以濟之今呂宋以麥收歉薄載穀易麥更為情理之當允從者著該督撫提督等轉飭有司按照穀麥時價均平糴糴不許內地之人抑勒欺詐俾番船載麥回國以濟其用竝將朕旨傳諭來商知之

又奉

上諭自古地方官員有進獻方物之禮蓋以地土所產貢之於君所以將其誠意而為君者鑒其意而酌納之所以篤堂廉之誼聯上下之情也朕即位以來亦循照舊例而行其中間有進獻珍寶古玩者朕概降旨停止不許呈進向來鎮臣中偶亦有隨督撫進獻者朕皆諭止之至於所獻之物備隨時賞賜內外臣工以示一體之意竝非朕所需用都中市賣不得之物而收貯內府也

此朕左右及廷臣所共知共見者雖臣之効忠於上君  
之加恩於下不在乎此然此亦係儀文禮節之一端所  
以歷來未廢凡為督撫者既以此將其誠敬之悃則當  
於採辦之時厚其價值俾所屬官民歡欣從事有踴躍  
之心無退縮之意方為事君盡禮之實心乃朕向聞各  
省大員採備貢物有恃上司體勢發價減少者以致民  
間視為畏途如榆次百姓不敢種好瓜肅寧畏植好桃  
外間傳為話柄近朕訪聞福建採買柑果有短價累地

方官民之處似此則與君臣聯接之本懷大相違背矣  
朕豈肯為此無益之儀文而令承辦之微員貿易之百  
姓或受擾累哉昔年石文焯在外任時進獻土產食物  
用數摺開列各品件件相同朕訝其重複問伊奏事之  
人伊奏云石文焯現在署理幾缺故用貢物幾分朕實  
不解其故後偶向年羹堯諭及年羹堯奏云外官之於  
上司現署幾印則饋送規禮亦是幾分朕始知外間有  
此不堪之陋規而石文焯竟徂而行之於君父之前其

識見庸劣一至此哉凡事謹小慎微不可不防其漸若以貢物而累及閭閻固萬萬不可即或交與屬員代辦而價值不敷令其暗中賠補是又假公濟私收受賄賂之巧術也似此食用微物朕發價市買何所不得豈肯絲毫累及地方可通行曉諭督撫等自接奉此旨為始著將前貢物之數再減一半儻再不遵行仍蹈舊轍朕只得將各省貢獻之例全行停止莫謂朕將自古通行之禮為務虛名而廢不體下情也

二十九日奉

上諭朕聞奉天地方凡事關旗民者俱送盛京刑部會審雖司員會同有司承審實皆司員主稿乃奉天司員積成陋習惟事威嚴一切人犯到案先將鎖鍊盤於地上令其膝跪謂之跪鎖繼以荆條互擊其背任意敲打謂之背花鞭又案無定限如上年八月間遼陽州民郭金美毆死旗人裴玉亨一案白晝毆傷更餘殞命當日旗員及知州會驗任聽屍親串同伴作混報多傷且傷痕

寬長逾格承審司員不即稟駁亦不揆度情理惟執定傷痕刑夾供認草率定擬本年閏四月內葛森到任始駁令另行驗審相距已十餘月尚未定案又筆帖式皆本處生長之人所司者不過繙譯之事乃當審訊之時輒亦列坐詰問此皆朕訪聞甚確者國家定例訊鞫人犯必須審問實情其應用刑訊者自有一定規條今奉天司員承審人犯一經到案不察虛實便以刑罰相加且於定例之外創為跪鎖等項此從來所未聞者似此



嚴刑重罰其中豈無冤濫至於筆帖式微員職司繙譯  
竝無審刑之責乃公然列坐審詰命案有乖體制以上  
二事著嚴行禁止儻再蹈從前陋習經朕察出定將該  
堂官及司員等一併嚴加議處至辦理事件自有限期  
而人命等案關係尤重若無定限則拖累牽連之弊不  
可勝數嗣後應如何定以限期俾得永遠遵行之處著  
盛京刑部侍郎會同該將軍悉心定議具奏

又奉

上諭黔省逆苗不法擾害黃平一帶村莊哈元生等領兵  
進勦逆苗雖聞風逃竄仍復盤踞山梁為負隅之技前  
已降旨授哈元生為揚威將軍專司征討惟是苗黨眾  
多地方遼濶現調四省官兵甚多滇黔之兵從上游前  
進湖廣之兵從下游前進其中相隔路遠哈元生調遣  
難周湖廣提督董芳熟悉苗地情形著授為副將軍一  
切勦撫機宜著與哈元生和衷協力公同辦理目前或  
應分領夾擊將來如何彈壓安置俱著哈元生董芳悉

心籌畫務期妥協以副朕委任之至意董芳著馳驛前  
往

世宗憲皇帝上諭內閣卷一百五十七

欽定四庫全書

世宗憲皇帝上諭內閣卷一百五十八

雍正十三年七月

上諭十四道

初八日奉

上諭前聞浙省海塘於本年六月初二日風潮偶作衝決之處甚多朕心深為軫念已降旨詢問情由並令速行搶修以防秋汛今朕訪聞得今歲風潮不過風大水湧

並非昔年海嘯可比且為時不久未有連日震撼衝汕情形若平日隨時補苴防護謹密自不致潰決如此之多總因數年來經理官員將舊日工程視同膜外並不隨時修補且將原題准其在歲修案內報銷之工不許修築以致根脚空虛處處危險不能捍禦風浪又海防兵備道乃特設專司之員責任綦重從前隆昇程元章等請將同知成貴題補朕因其平日不曾經歷河工誠恐未必勝任且陞用太驟是以姑令署理試看今聞伊

於工程並未諳練兼之患瘧經年不能辦事東塘同知張偉為人軟弱安坐海寧西塘同知李飛鯤存心狡猾日在省城奔競俱非實心任事之員而隆昇與程元章等意見又不相合汪滢張坦麟但知隨聲附和顧國家公事前因虐使民夫尅減石料經朕降旨申飭略知收斂然每石萬觔尚折減六七折不等欲符原估六萬兩之數一任石匠包賠逃亡誤工平時人事廢弛若此何以抵禦狂瀾况朕不惜數百萬帑金冀以保全一方

民命而各官懷挾私意不知為國為民宜乎

上天垂象以示儆也兵備道係緊要之員今成貴患病溺職如此隆昇程元章汪濬張坦麟總理協辦所司何事郝玉麟既在浙江豈無見聞何以俱不題叅著伊等明白回奏兵備道員缺即著伊等於知府中揀選題委目今秋汛正大搶修保護最為急務一切事宜俱交與隆昇程元章汪濬張坦麟等悉心料理儻仍蹈前轍再有疎虞致傷田廬民命必將伊等從重治罪不稍寬貸郝玉



麟既不據實奏聞亦不能置身事外至於僱募人夫採辦物料務須公平給值聽從民便俾閭閻踴躍從事不得涉於勉強或繩以官法刑驅勢迫擾累地方致負朕愛養民生至意

又奉

上諭各省拿獲賭具查其製造年月在半年之內者大小官員有議叙之例所以獎勵臣工使之實心禁約賭博也今朕訪聞各省拿獲賭具均稱造賣在半年以內迨

細心根究率多不實蓋地方官希冀議叙未免支飾邀功即新任署任原在半年以內無庸支飾又未免瞻顧前官失察之愆為之改移遷就不知造賣年月既屬改移則販賣之多寡夥黨之有無何由得實是其弊更不止於冒叨議叙也所恃上司稽核精詳庶幾功過不爽然上司例又並得議叙苟非公正不欺者勢必苟且雷同矣夫賭博之害最關風俗人心澄源端本則賭具在所必嚴計效責功則勸懲誠難偏廢然州縣身任查拿

而上司則不過申嚴督率本屬分內之事今因並得議  
敘之例轉滋徇捏之端而不能收勸懲之實效其應作  
何分別定例之處著九卿悉心妥議具奏

初九日刑部以疎脫重犯處分分別定例具奏奉

上諭此本內議稱高牆內拘禁人犯倘因保出責令兵丁  
看守致有疎脫者如審無賄縱情弊枷號二十五日鞭  
七十等語高牆拘禁人犯與外省不同八旗之人非親  
即友最易受囑徇情且勢力重大之人亦多不難賄買

挾制若止定以枷號二十五日鞭七十之薄懲則將來之疎縱作弊者不可勝數矣又稱高牆係京城重地若有越獄重情各照外省之例加一等治罪等語此處並未明白聲說旗人安知外省是何例今加一等又是何罪共相凜遵乎又稱八旗將斬絞人犯送部及八旗互相遞送中途疎脫者照外省例分別議處治罪等語外省解送人犯或數百里千里不等時日既多路程又遠往往難於防範至八旗解部及互相遞送之人犯相隔

不過數里或十餘里頃刻可至若其中敢有疎脫等情則藐視國法已甚豈可引外省之例以定其罪朕前降旨著照外省例如何協捕如何治罪敕令定議者蓋以外省有例而在京無例亦應酌定規條以便遵奉並非謂外省之例即應通行於在京也今憲德等於奉特旨交議之事草率具奏且處處牽引外省以為言顯係朦混著將刑部滿堂官交部嚴察議奏此案著另議具奏初十日辦理苗疆事務王大臣等奉

上諭據廣西提督霍昇奏稱總兵王無黨等率領兩粵官兵七千餘名陸續前到古州分兵前往八寨勦殺逆苗七次斬獲甚多現與古州總兵韓勲酌議分撥進勦等語朕思古州地方為新疆要地關係甚重韓勲等雖分兵攻擊八寨等處而古州尤不可忽若因古州地方現在無事而銳意勦賊將赴黔之粵兵及該鎮兵丁俱派往八寨等處則古州地方兵力未免單弱不可不籌畫萬全且接連粵省彈壓尤為緊要爾等速議具奏

十一日奉

上諭軍營撤回之兵丁今已漸次進口朕訪聞得伊等進口之後見有酒肆徃徃入而沽飲雖目前尚無酗酒生事實跡然將來撤回之兵甚多不能保無麪蘖迷心而懼於法網者伊等俱係出征回家之人若因此獲罪朕只得執法雖欲從寬而國法又豈可廢著該督撫轉飭州縣官嚴禁賣酒之家不得賣與軍營撤回之兵丁違者重加責懲并令該管將弁等曉諭所轄之兵丁各遵

朕諭思患預防以副朕眷養之意

十四日奉

上諭浙閩江西等省有棚民之州縣朕皆留心揀發牧令  
前往俾司化導董率之任蓋此等無業民人聚散無常  
往來莫定其間良頑不一易於藏奸若稽察稍疎必至  
漸為閭閻之擾向聞棚民留住之地方皆責成本處地  
主山主出具保結並非來歷不明之輩始許容留而牧  
令官員於每年歲底親往查點一次儻有作奸犯科而



地主山主不行舉首者一體治罪此向例也今聞法久廢弛有司等視查點為具文而地主山主亦以保結為虛應故事大非朕除暴安良教民成俗之本意著該督撫等轉飭有司實力奉行毋或怠惰儻有不遵即行嚴叅從重議處若督撫失於覺察經朕訪聞亦必加以嚴譴

十五日奉

上諭浙江海塘工程原在平日隨時補苴防護謹密始可

以禦猝然之風浪乃近年以來經理官員將舊日工程以為非已身經手者視同膜外不加修補以致今年六月初二日風大水湧遂潰決塘工如此之多此朕訪聞最確者朕為浙省海塘宵旰焦勞無時或釋且不惜多費帑金冀登斯民於衽席年來所降諭旨不下數十百次矣隆昇程元章汪濛張坦麟皆朕特簡之大員委以防川之鉅任且訓諭諄諄望其實力奉行勉以和衷共濟豈料伊等私心蔽錮意見參差全無公忠之念安有

身在地方目覩隄岸空虛而不督率屬員先事預防急為修補者隆昇程元章汪濇張坦麟俱著交部嚴察議奏目今江南塘工告竣王柔著補授浙江海防兵備道速赴新任

十九日奉

上諭浙江海塘工程關係民生最為緊要朕宵旰焦勞不惜多費帑金為億萬生靈謀久遠又安之計所以告誡在事臣工者已至再至三矣不料經理諸臣各懷私意

彼此參差以致乖戾之氣上干

天和。有今年六月風浪潰堤之事。今雖勉力搶修。尚不知能捍禦秋潮否。至於建築石塘工程浩大。若諸臣陋習不改。仍似從前。則大工何所倚賴。朕再四思維。大學士朱軾廉慎持躬。昔曾巡撫浙江。諳練塘工。今雖年逾七旬。精神不逮。而董率指示。似尚能為朕。以此詢問之。伊自稱情願効力。著由水路前往。令該部給與水程。勘合並令沿途撥兵護送。伊子朱必堦著隨去。朱軾到浙之日。

稽查指授總理大綱至一切工程事務仍著隆昇程元章汪澆張坦麟等照前辦理俱聽朱軾節制若大臣中有懷私齟齬者著朱軾據實叅奏朕必嚴加處分文武官員等有營私作弊或怠玩因循者即行糾叅從重治罪朱軾未到之先所有應辦工程物料著隆昇程元章等上緊辦理無得藉口等候欽差徘徊觀望以致稽遲

二十日奉

上諭朕軫念行間將士從前曾降諭旨令將陝西等省現

出各缺於十缺之中分出三缺以陞補出征弁員數年  
以內隨征將弁各按出力等次俱得通行擢用現今西  
路官兵次第撤回凡弁員之陞補他省者俱應各赴新  
任今據署大將軍查郎阿等奏稱將弁中有陝甘人員  
陞補直隸山西山東河南四川五省之千把伊等隨征  
年久俱從兵丁拔補今復回本籍又遠赴新任或有無  
力攜帶家屬者若隻身遠去則家中又恐無人養贍可  
否將現在西路軍營之陝甘人員內陞補直隸等五省

之千把仍留在陝甘各營食俸辦事遇缺挨補等語向  
例千把缺出俱於本省標營就近拔補因朕加恩出征  
將弁欲其早得陞轉是以有六省分缺之舉今大兵撤  
回之後若干把等令其遠赴新任自然力量不敷查郎  
阿等奏請之處甚是惟是伊等効力有年撤回之後留  
於本省候缺未免多需時日尚未允協著陝甘督撫提  
鎮將現任各千把之未經出征者分別查明如內有食  
俸年淺及未曾出力之人令其出缺候補其所出之缺

即將軍營撤回留陝千把悉行補用至該千把等既留  
陝甘補用則所遺直隸等五省原缺應行拔補查直隸  
等五省亦有自軍前撤回應補千把之人著該督撫等  
即將伊等補授此缺倘撤回各弁人多缺少亦照陝省  
將俸淺未經出征之千把內暫行出缺補用伊等以示  
朕體恤從征弁員之至意

又辦理軍機大臣奉

上諭朕軫念鄂爾多斯貧乏蒙古有就食口內典賣妻子



人口者前已降旨令該地方官查明賞給原價贖出照看安插今據總理西安巡撫事務史貽直等奏稱查出雍正十二三年邊民并延綏鎮及各將弁共買蒙古子女二千四百餘名口再雍正十一年以前尚有邊民娶買乞養者今亦查出先將上年今年凡有典買蒙古人口逐細查出贖回應否俱發夷漢衙門查明親屬轉交完聚之處相應請旨再米國正身為鎮臣首先倡買五名以致該將弁軍民人等效尤共買二十七名口臣等

不敢徇隱等語蒙古乏食貧民典賣子女其已經查出贖回人口朕另降旨詢問該扎薩克等情願領回者令其領回完聚儻有不願領回者再行商酌料理安插之法其未經查報人口務須逐一清查一體辦理至米國正及將弁等因蒙古乏食用價收買俾得存養與尋常典買蒙古人口有間著將所買人口交出不必叅處其雍正十一年以前邊民娶買乞養人口亦降旨詢問該扎薩克等有情願領回者亦照原價賞給贖回其中若

有因歷年既久居處相安不願領回者即聽其存留不必贖回俱免其查究嗣後該地方官務須嚴禁邊民不得娶買乞養蒙古人口儻有故違定例私自典買者一經察出定行從重治罪並將該地方官一併嚴加議處

二十三日奉

上諭西陲用兵以來甘肅等處民人急公効力甚屬可嘉是以朕屢沛恩膏免其正賦今年又將地丁錢糧全行蠲免所以優恤民力令其寬裕也今據巡撫許容奏稱

五月接奉諭旨之時已據各屬詳報完納銀一十二萬餘兩查定例已完者充餉未完者免徵此項應照例充餉等語朕因嘉獎秦民奉公趨事是以特加格外之恩而其中爭先完課者尤為良善之民著將已完若干准作來年正賦許容可傳旨速行曉諭俾閭閻咸知朕意並督率有司實力奉行毋使胥吏土棍作弊中飽以副朕加惠秦民之至意

又兵部議奏湖南添平麻寮二所土官覃慶永等呈

請辭職奉

上諭土官覃慶永等既無防禦之責亦無管束軍民之任懇請辭職應准其請將土官裁汰但朕念伊等祖父曾經隨征効力不忍令其廢置著賞給千把總職銜准伊等子孫永遠承襲若有年力精壯情願隨營差掾者准其食俸効用才具優長者著該管大臣保題照武職例陞轉其如何分別定例之處著該部定議具奏

二十八日工部議覆直隸河道總督朱藻奏官民捐

納土方應請分別議叙奉

上諭向來沿河文武官弁有種柳葦議叙之例遵行已久不便停止今若又添土方物料議叙之例恐奉行不善將來必致滋弊累民凡本地方現任官弁捐輸土方物料者尤為不可槩不准行若紳衿民人等情願捐輸者著分別定例議叙

又奉

上諭西路官兵前因岳鍾琪調度失宜諸事廢弛遂致軍

氣不揚士志不振自雍正十年查郎阿統兵以來與張廣泗同心協理事事整頓時時訓練凡行間將士俱知奮勇効力營伍為之改觀所以十一年及十二年賊人兩次侵犯卡倫俱為我兵擒勦未令免脫且賊人因我軍嚴整畏憚懾伏從前狡獪伎倆不敢復逞此皆由查郎阿等辦理妥協之所致今大兵撤回查郎阿張廣泗俱著交部從優議叙具奏再自雍正十年以後調往西路之奉天船廠索倫官兵及蒙古官兵皆為奮勉其中

之勞績懋著者亦宜加恩賞勵著查郎阿查明據實具  
奏交部議叙其未經著有勞績及岳鍾琪任內行走之  
人不必開入

世宗憲皇帝上諭內閣卷一百五十八



欽定四庫全書

世宗憲皇帝上諭內閣卷一百五十九

雍正十三年八月

上諭九道

初一日署陝西總督劉於義奏銷回營兵丁買補營馬一案奉

上諭陝省兵丁自出征以來頗為効力其買補營馬准照軍需馬匹之例以十三兩報銷以示朕加恩兵丁之意

至現今軍務告竣嗣後買補營馬仍照定例報銷

初三日奉

上諭從前經理苗疆之意原因苗性兇頑久為地方居民之害是以計議勦撫為又安百姓之計若云利其民則其人不過如鳥獸之屬若云貪其土地則其地本在吾版圖之中縱使日久之後苗衆抒誠向化輸納錢糧計算尚不及設汛養兵萬分之一然則國家果何所利而為此哉乃經理之始既多疎虞而善後之策又復草

率即如逼近苗疆之緊要州縣設兵不過三四十名全  
不足以資捍禦而逆苗萌動之時文武官弁又皆在睡  
夢之鄉茫然一無知覺今逆苗突入內地勾引熟苗肆  
行搶掠良民遭其荼毒以安民之心而成害民之舉朕  
與前後經理之大臣安能辭其過耶每當讞獄之時遇  
身獲重罪之犯應加刑辟者朕與執法之臣皆再四推研  
求其生而不可得然後置之於法此心尚應惻然其見  
小卑劣者尚欲賣法以為陰德今黔省被害之民皆無

罪之良民也我君臣目視其遭兇苗之慘禍如蹈湯火  
朕言念及此幾為淚落實無顏以對被害之黎庶也不  
知代朕經理之大臣又如何存心矣其幸得保全之民  
人此時當竭力撫綏以贖吾君臣從前之過勿憚煩勞  
勿惜公帑期登災黎於衽席若再稽查不力董率無方  
以救災恤困之資或飽污吏貪官之腹不令窮民得沾  
實惠經朕訪聞必將大小官員在該省即時正法以示  
衆或有但知潔已而不能安插貧民者著該督撫即以

溺職題叅不必論其向日之官聲稍為寬貸其災黎避  
徃之地方亦照此旨一體料理若視為鄰省之事稍存  
怠忽之心朕亦必治以溺職之罪若有將賑恤之項借  
名侵蝕者亦必即行正法貴州既有被害之州縣則運  
餉募夫俱須鄰郡接濟著將今年黔省錢糧通行蠲免  
其被賊殘害之州縣蠲免三年錢糧若有已徵在官者  
准抵下次應徵之額賦著將此旨通行曉諭各省官弁兵  
民等咸使聞知

又九卿等奉

上諭從來滿洲風俗於尊卑上下之分秩然有禮即冠履亦從不濫置一處此風實應永為典則當年

聖祖仁皇帝惟恐古風漸遠特頒

諭旨諄切告誡朕即位以來敬謹奉行凡於本章奏摺中遇有

壇

廟等字者必敬謹捧持不敢置於牀座近見滿洲薰染漢習

諸凡輕忽禮意漸弛竟有將稿案任意安放鞞襪間者此風不可不嚴為整飭以做玩褻嗣後部院及八旗官員人等於一切稿案或置懷中或貯囊內皆可攜行不得夾帶鞞襪之間該管上司務須嚴行查禁違者即行叅處如不實力遵奉經朕查出將該管上司必加嚴處

初五日奉

上諭據直隸總督李衛奏稱保定訓練之兵聞挑選赴楚之旨無不感戴國恩爭先願往其中有偶患疾病略覺

軟弱及年力稍次存留在營者無不再三告懇叩頭垂涕驅之不去衆目共見竟有蔣廷貴一名回寓自縊臣見兵氣勇銳如此不敢壅於上聞等語朕聞蔣廷貴之事深為竒異此實向來綠旗兵丁中所未聞者惟我滿洲舊俗見義必赴臨陣必先若徵兵選將之時已不得與則深以為恥或以疾病衰頹而卒於牀第之間妻子之手者則以不得致命疆場為有生之大恨此等剛勁之概勇敢之氣與生俱來千萬人如出一心實能超越



乎往古而為法於後世也乃數十年來承平日久人習安閒遂將急公趨事之古風漸漸改易每當出兵遠差之時雖求去者紛紛皆不過飾為外貌而其實則胸懷退避並無勇往之誠心竟至派出統領之大臣不以為朕榮任選用之恩而以為上意不喜特令遠離服勞受苦者又或疑人讒譖而有此差者種種卑鄙私見不可悉數如發軍前効力字樣乃指獲罪之人賜以自新之路令圖功贖罪之謂豈衝鋒破敵之兵弁皆罪人之役

乎若然則黑龍江寧古塔等處簡用之官員皆謂獲罪  
發遣可乎即如前年署副都統魯保具奏朕前怨伊該  
管大臣有意苛求派伊送馬苦差似此偷安懶惰之人  
豈尚知有我滿洲夙昔之美俗乎蔣廷貴以一綠旗兵  
丁而迫欲効力戎行不獲如願遂捐軀命而不恤不知  
滿漢蒙古在內在外之弁兵等受國家多年爵祿養育  
之恩而存畏難退縮之念者聞蔣廷貴之事其亦抱慚  
負愧於心否耶著將此旨交與內外領兵大臣刊刻宣

諭咸使聞知蔣廷貴著照陣亡兵丁例賞恤以示恩獎  
十一日奉

上諭黔省逆苗不法擾害地方以致居民逃避於隣省湖  
南接壤黔疆朕聞該督撫有司經理有方俾轉徙之災  
黎不致失所甚屬可嘉著該督撫將實心辦事之員記  
名俟事竣之後奏請議叙沅州切近黔省聞難民聚集  
者竟至萬人且催募夫役赴黔運餉者又多係沅州之  
民除已降旨加增價值用示恩恤外朕念沅民急公趨

事倍於他處著將沅州今年地丁錢糧全行蠲免若有  
已徵在官者准抵明年應徵之額賦著該地方官敬謹  
奉行毋使胥吏侵蝕中飽其雲南廣西近黔之郡縣若  
有似此多養難民努力趨事者著該督撫查明具奏朕  
必將該處官民亦加恩澤其怠忽從事之官員即著嚴  
參照前旨從重治罪

十三日奉

上諭數年以來雲南地方屢有用兵籌餉之事民力輓輸

未免勞頓朕心深為軫念今聞元江普思等處軍務告竣用是特沛恩膏將本年通省地丁錢糧全行蠲免俾滇民均沾實惠若諭旨到日有已徵在官者准抵明年應納之正賦著該督撫藩司董率州縣官員敬謹奉行毋使胥吏土棍人等侵蝕中飽以副朕加惠滇民之至意

十五日奉

上諭據直隸總督李衛奏進遵化州

陵寢垣外地畝及保定縣藉田所產瑞穀多種竝有一本九穗者朕覽之不勝欣慶朕常言地方年穀之豐歉在於督撫居官之感召十餘年來留心體察厯厯不爽至於京師畿輔之地則內觀刑部讞獄之公私外觀督撫政令之得失以為雨暘休咎之本即如直隸地方從前旱澇不時晴雨往往差忒今李衛節制全省則五穀豐收可稱大有又如王士俊總督河東二省此二省同慶有秋民人樂業此近事之顯然可見者總之感召之責固

在督撫而用人之責則在於朕此中是非得失朕實與督撫共之近而京畿既有內外諸臣之分理不得專指為朕一人之事遠而雲貴等省雖有督撫之代理亦不得推卸以為非朕之事從前所降諭旨甚明所望內外大臣官員等時時儆戒刻刻提撕信

天道之昭垂凜鑒觀之不遠則豐亨有慶災沴潛消萬民共受其澤矣朕素不言祥瑞久已降旨不令各省進獻嘉禾今因瑞穀產於

陵寢地方感

天

祖

皇考之昭示福應信而有徵特賜廷臣共觀竝將朕敬慎乾  
惕之意重加宣諭期與諸臣共勉之

十六日奉

上諭從前降旨令八旗於朔望日宣講

聖諭廣訓以教誨兵民俾知忠孝立身之大義乃數年以來



各旗視為具文奉行不力即或宣講亦不過在各旗公衙門及佐領家中聽講之人往往不能齊集查八旗例於每月逢三逢八之日齊集教場操練兵丁若於射箭之後宣講

聖諭一二條則地廣人多庶得家喻戶曉有所裨益聞正藍旗漢軍現在教場宣諭著八旗照此通行又聞皇城內鑲黃旗正黃旗正白旗侍衛教場三處係挑選侍衛操練弓馬之所於從前地動之後牆垣傾圮屋宇亦不堅

固著該管大臣詳加驗勘及時修葺竝派人嚴加看守  
毋得疎忽

十七日奉

上諭朕軫念出征弁員已降旨將應補千把之人即於該  
省補用若缺少人多則將食俸年淺未曾出力之千把  
暫行出缺令軍營撤回人員即得頂補以獎勤勞今思  
軍營兵丁中奮勇戎行出衆効力或臨陣對敵得受恩  
賞大將軍曾給以外委委牌者此等人回營之後亦應

令其即補以示獎勵著該管大臣將伊等効力之處查核明確並考驗其技勇若現有外委之缺即令頂補如缺少人多即將現在外委人員內未曾出力而技藝生疎者令其出缺以軍前之外委頂補可即傳諭直隸山陝等數省一體遵行



世宗憲皇帝上諭內閣卷一百五十九